



REPUBLIKA E KOSOVËS / REPUBLIKA KOSOVA

GJYKATA THEMELORE PRISHTINE - DEGA E GJYKATËS FUSHË KOSOVE

Numri i lëndës: 2024:034413

Datë: 26.03.2024

Numri i dokumentit: 05507804

P.nr.120/24

NË EMËR TË POPULLIT

GJYKATA THEMELORE NE PRISHTIË – DEGA FUSHË KOSOVË - Departamenti i Përgjithshëm, Divizioni Penal, sipas Gjyqtares Laura Hoti Statovci, me pjesëmarrjen e bashkëpunëtorit profesional Albrim Kastrati, në lëndën penale të akuzuarit E. B. nga O....., i akuzuar për veprën penale Lëndim i lehtë trupor neni 185 par 1 nën par 1.4 të KPRK-së, duke vendosur sipas aktakuzës së Prokurorisë Themelore në Prishtinë – Departamenti i Përgjithshëm PP/II.nr.92/2024F të datës 23.02.2024, në seancën e shqyrtimit fillestar jopublik të mbajtur me datë 27.02.2024, në praninë e Prokurorit të Shtetit Lulzim Aliu, i dëmtuari S. B. dhe i akuzuari E. B. me mbrojtësin sipas detyrës zyrtare av. Petrit Lladrovci, me datë 28.02.2024 mori dhe publikisht shpalli ndërsa me datë 26.03.2024 përpiloi këtë:

A K T G J Y K I M

I akuzuari E. B., i biri i R..... dhe nënës V....., e gjinisë G....., i lindur me, në P....., me vendbanim në rrugën ‘‘V..... nr.....’’P.....- në O....., i pa martuar, me gjendje të dobët ekonomike, me numër personal, Rom, Shtetas i Republikës së Kosovës.

ËSHTË FAJTOR

Sepse:

Me datë 29.01.2024, rreth orës 00:10, në Rrugën ‘‘V.....’’, P....., në O....., konkretisht në shtëpinë e tyre, për shkak të mosmarrëveshjeve me të dëmtuarin-vëllain e tij S. B., i pandehuri, ka ushtruar dhunë fizike ndaj të dëmtuarit, me qëllim të shkaktimit të lëndimeve trupore, në atë mënyrë derisa i dëmtuari ishte në shtëpi së bashku me nënën dhe bashkëshorten e tij, ka ardhur i pandehuri E., i cili posa ka hyrë në sallon, ka lëshuar muzikë me zë të lartë, ka filluar të bërtas duke kërcënuar me fjalët ‘‘e kam pa babën në ëndërr, ai më ka thënë me ju myt krejtve’’, më pas i dëmtuari duke tentuar ta qetësonte, i njëjti e ka gërvishtur dy herë në qafë, si pasojë e këtyre veprimeve, të dëmtuarit i ka shkaktuar lëndimet e lehta trupore me pasojë të përkohshme për shëndetin, në formë të gërvishtjes lëkurore të regjionit të qafës,

- *Me këtë ka kryer veprën penale Lëndim i lehtë trupor nga neni 185 par 1 nën par 1.4 të KPRK-së.*

Andaj, gjykata në bazë të neneve 4, 7, 8, 9, 10, 17, 21, 38, 39, 40, 43, 69, 70, 71, 72 dhe 185 të KPRK-së dhe neneve 358, 359, 360 dhe 364 të KPPRK-së, të akuzuarin e gjykon me:

DENIM ME GJOBË

- I. Në shumen prej 1,000.00 (një mijë) Euro në të cilin dënim të pandehurit i llogaritet koha e kaluar në paraburgim nga data 29.01.2024 deri me 27.02.2024 duke zbritur gjobën për çdo ditë të kaluar në paraburgim nga 20 (njëzet) Euro të gjobës. Ashtu që gjobën e mbetur në shumen prej **440.00** (katërqind e katër dhjetë) Euro i pandehuri obligohet ta paguaj në afat prej 60 ditësh nga dita e plotfuqishmërisë së këtij aktgjykimi.
- II. Nëse i pandehuri dënimin me gjobë nuk e paguan në afat të caktuar më lartë, atëherë gjykata këtë dënim do ta zëvendësoj me dënim burgu në kohëzgjatje prej 22 (njëzet e dy) ditësh, duke llogaritur një ditë burgim me 20 (njëzetë) euro të gjobës.
- III. Obligohet i pandehuri që në emër të shpenzimeve të procedurës gjyqësore të paguaj shumën prej 20 (njëzet) Euro në emër të paushallit gjyqësor, si dhe shumën prej 20 (njëzet) Euro në emër të kompensimit të viktimave të krimit, të gjitha këto në afat prej 30 ditësh nga dita e plotfuqishmërisë së këtij aktgjykimi.
- IV. Pala e dëmtuar S. B., me adresë të banimit në rrugën "V..... nr. 51" P..... në Komuna O....., për realizimin e kërkesës pasurore-juridike, udhëzohet që ta realizon në procedurë të rregullt civilo-juridike.

A r s y e t i m

Prokuroria Themelore në Prishtinë - Departamenti i Përgjithshëm, ka paraqitur Aktakuzë PP/II.nr.92/2024F të datës 23.02.2024, ndaj të akuzuarit E.B. për shkak të dyshimit të bazuar mirë se ka kryer veprën penale Lëndim i lehtë trupor nga neni 185 par 1 nën par 1.4 të Kodit Penal të Republikës së Kosovës (KPRK-së, 06/L-074).

Gjykata, në këtë çështje penale juridike ka mbajtur seancën e shqyrtimit fillestar me datë 27.02.2024, në prani të Prokurorit të Shtetit Lulzim Aliu, të dëmtuarit S. B. dhe të pandehurit E. B. me mbrojtësin sipas detyre zyrtare av Petrit Lladrovci ku i pandehuri u njoftuan me të drejtat e tij, me aktakuzën dhe provat kundër tij. Pas kësaj prokurori i shtetit lexoj aktakuzën kundër të pandehurit.

Pas leximit të aktakuzës nga prokurori i pandehuri u deklarua se e pranojnë fajësinë për veprën penale për të cilat akuzohet sipas aktakuzës.

Pas deklarimit të pandehurit dhe mendimit të prokurorit se nuk e kundërshton pranimin e fajësisë, Gjykata konstatoj se i pandehuri ka pranuar fajësinë në mënyrë vullnetare dhe pa asnjë presion, i pandehuri është i vetëdijshëm për pasojat e pranimit të fajësisë, si dhe të gjitha kërkesat nga neni 248 par. 1 të KPPRK-së janë përmbushur. Ashtu që gjykata aprovon deklarimin për pranimin e fajësisë nga ana e të pandehurit.

Duke pas parasysh se gjykata ka aprovuar pranimin e fajësisë nga ana e të akuzuarit dhe ka vërtetuar se nuk ekziston asnjë rrethanë nga neni 357 par.1 pika 1.1, 1.2 dhe 1.3 të KPPRK-së, si dhe faktin se janë plotësuar kushte nga neni 242 par. 6 lidhur me par. 2 të KPPRK-së, atëherë në këtë çështje penale nuk është zbatuar procedura e provave, por gjykata pas deklarimit të akuzuarve se e pranojnë fajësinë në kuptim të nenit 242 par. 6 të KPPRK-së ka vazhduar me shqiptimin e dënimit.

Me faktet e ofruara ne shkresat e lëndës, e po ashtu me pranimin e fajësisë nga ana e të pandehurit është vërtetuar gjendja faktike si në dispozitiv të këtij aktgjykimi. Nga gjendja e vërtetuar faktike si është përshkruar në dispozitiv të këtij aktgjykimit, rrjedh se në veprimet e të pandehurit E. B. qëndrojnë të gjitha elementet e veprës penale Lëndim I lehtë truporë nga neni 185 par 1 pika 1.4 të Kodi Penal i Republikës së Kosovës, Nr. 06/L-74.

Sa i përket fajësisë gjykata ka gjetur se i akuzuari e ka kryer veprën me dashje ndërsa gjatë procedurës penale nuk janë paraqitur rrethana të cilat do ta zvogëlojnë apo përjashtojnë përgjegjësin penale të akuzuarit, kështu që i njëjti është penalisht përgjegjës.

Duke vendosur lidhur me llojin dhe lartësinë e dënimit, gjykata i ka vlerësuar të gjitha rrethanat lehtësuese dhe rënduese ne kuptim të nenit 70 të KPRK-se. Kështu si rrethana lehtësuese për të akuzuarin, gjykata ka vlerësuar faktin se i akuzuari ka treguar sjellje korrekte gjatë shqyrtimit gjyqësor duke pranuar fajësinë, duke u ndier i përgjegjshëm për veprimet e tij dhe duke shpreh keqardhje për veprën që e ka kryer. Të gjitha këto rrethana kjo gjykatë i ka pranuar si rrethana lehtësuese ne dobi të akuzuarit, ndërsa rrethana rënduese nuk janë konstatuar nga Gjykata me përjashtim të faktit se vepra penale është kryer brenda marrëdhënies familjare.

Andaj, duke vlerësuar këto rrethana, Gjykata ne kuptim të nenit 43 të KPRK-se të akuzuarin e gjykoi si ne dispozitiv të këtij aktgjykimit, me të cilin do të arrihet edhe qëllimi i dënimit.

Gjykata ka ardhur ne përfundim se dënimi i shqiptuar të akuzuarit është ne përputhje me shkallen e përgjegjësisë penale të tij dhe me intensitetin e rrezikimit të vlerave të mbrojtura të shoqërisë. Gjykata gjithashtu është e bindur se vendimi mbi dënim do të shërbej për arritjen e qëllimit të dënimit ne pengimin e të pandehurit ne kryerjen e veprave penale ne të ardhmen veçanërisht llojin e njëjte të veprës penale, por ai do të ndikoj edhe si preventive e përgjithshme për personat tjerë që të përmbahen nga kryerja e veprave penale ne përputhje me nenin 38 të KPPRK-se.

Duke u bazuar ne nenin 449 par. 2 pika 2.6 dhe 452 par.1 të KPPRK-se si dhe në bazë të nenit 36 par.3 nën par. 3.1 të Ligjit për kompensimin e viktimave të krimit nr.08/L-109, Gjykata ka vendosur për shpenzimet e procedurës penale në shumën e përgjithshme prej 40 Euro.

Nga arsyet e cekura më lartë dhe me zbatimin e nenit 364 të KPPK-së është vendosur si në dispozitiv të këtij aktgjykimi.

GJYKATA THEMELORE NË PRISHTINË-DEGA FUSHË KOSOVË,
DEPARTAMENTI I PËRGJITHSHËM PENAL
P.nr.120/2024 datë 26.02.2024

Gjyqtarja e vetme Gjykuese

Laura Hoti Statovci

KËSHILLA JURIDIKE: Kundër këtij aktgjykimi palët kanë te drejtë të parashtrojnë ankesë në afat prej 30 ditësh, nga dita e pranimin të të njëjtit. Ankesa i dërgohet Gjykatës së Apelit në Prishtinë përmes kësaj Gjykate.